

摘藻堂四庫全書薈要

集部

欽定四庫全書薈要

集部

漢魏六朝百三家集卷七十五



詳校官候選知縣臣吳甸華

欽定四庫全書薈要卷一萬九千六百六十四

集部

漢魏六朝百三家集卷七十五

明 張溥 輯

王儉集

賦

靈丘竹賦

靈丘深沈蔓竹凝陰神根合拱楨榦百尋振芳條乎崑
岳敷綠采於高岑沿淮海而蔚映帶沮漳而蕭森至東

南而擅美在淇衛而流音方靈壽而均茂儀菌桂而成
林若乃青春受謝九野舒榮綠蘋齊葉白芷抽萌蘼蔥
蔥而特秀篠擢穎而垂英霜皦鏡於原隰木衰疏於郊
阡翠葉與飛雪爭采貞柯與增冰競鮮

和竟陵王高松賦

山有喬松峻極青蔥既抽榮於岱嶽亦擢穎於荆峰若
乃朔窮於紀歲亦莫止隆冰峩峩飛雪千里嗟萬有之
必衰獨貞華之無已積皓霰而爭光延微颺而響起

表

諫壞宋明帝紫極殿以材柱起宣陽門表

臣聞德者身之基儉者德之興春臺將立晉卿秉議北
宮肇構漢臣盡規彼二君者或列國常侯或守文中主
尚使諫諍在義即悅況陛下聖哲應期臣等職司隆重
敢藉前誥竊乃有心陛下登庸宰物節省之教既昭龍
袞璇極簡約之訓彌遠乾華外構采椽不斷紫極故材
為宣陽門臣等未譬也夫移心疾於股肱非良醫之美

畏影迹而馳驚豈靜處之方且又三農在日千畝咸事
輟望歲之勤興土木之役非所以宣昭大猷光示遐邇
若以門居宮南重陽所屬年月稍久漸就淪胥自可隨
宜修理而合度改作之煩於是乎息所啟謬合請付外
施行

請解僕射表

臣遠尋終古近察身事邀恩幸藉未見其倫何者子房
之遇漢后公達之逢魏君史籍以為美談君子稱其高

義二臣才堪王佐理非曲私兩主專仗威武有傷寬裕
豈與庸流之人憑含弘之澤者同年而語哉預在有心
胡寧無感如使傾宗殞元有益塵露猶當畢志驅馳仰
訓萬一豈容稍在形飾以徇常事九流任要風猷所先
玉石朱素由斯而定臣亦不謂文案之間都無微解至
於品裁臧否特所未閑雖存自勗識不副意兼竊而任
彼此俱壅專情本官庶幾髣髴且前代掌選未必俱在
代來何為於今非臣不可傾心奉國匪復還讓之與預

同休戚寧俟位任為親陛下若不以此理賜期豈仰望
於殊眷頻冒嚴威分甘尤戾

又

待臣於常均之外眄臣于代僚之右親垂其章秉非其
器霸府方隆超居元佐國朝草昧參贊百揆

求解尚書表

臣比年辭選具簡天朝欵言彰於侍接丹誠布於朝野
物議不以為非聖心未垂矜納臣聞知慧不如明時求

之微躬實允斯義妄庸之人沈浮無取命偶休泰遂踐
康衢秋葉辭條不假風飈之力太陽躋景無俟螢爝之
暉晦往明來五德遞運聖不獨治八元亮采臣逢其時
而叨其位常總端右丞管銓衡事涉兩朝歲綿一紀盛
年已老孫孺巾冠人物徂遷逝者將半三考無聞九流
寂寞能官之詠輟響於當時大車之刺方興以來日若
夫紺貂衣袞之貴四輔六教之華誠知匪服職務差簡
端揆雖重猶可勉勵至於品藻之任尤懼其阻夙宵罄

竭屢試無庸歲月之久近世罕比非唯悔吝在身故乃
惟塵及國方今多士盈朝羣才競興選衆而授古亦何
人冒陳微翰必希天照至敬無文不敢煩黷

議

郊殷議

南齊高帝建元元年七月有司奏郊殷之禮
未詳郊在何年復以何祖配郊殷復在何時
未郊得先殷與不明堂亦應與郊同年而祭
不若應祭者復有配與無配不祀者堂殿職
僚設置云何八座丞郎通闕博士儀曹郎中
裴昭明儀曹郎中孔暹議今年七月宜殷祀

來年正月宜南郊明堂並祭而無配殿中郎
司馬憲議南郊無配饗祠如舊明堂無配宜
應廢祀其殷祀同用今年十月右僕射王儉
議詔可明堂可更詳有司又奏明堂尋禮無
明文唯以孝經為正竊尋設祀之意蓋為文
王有配則祭無配則止愚謂既配上帝則以
帝為主今雖無配不應闕祀徐邈近代碩儒
每所折衷其云郊為天壇則堂非文廟此實
明據內外百司立議已定如更詢訪終無異
說傍儒依史竭其管見既聖旨惟疑臣下未
敢詳廢置之宜仰
由天鑒詔依舊

案禮記王制天子先禘後時祭諸侯先時祭後禘春秋
魯僖二年禘明年春禘自此以後五年再殷禮緯稽命

徵曰三年一祫五年一禘經記所論禘祫與時祭其言
詳矣初不以先殷後郊為嫌至於郊配之重事由王迹
是故杜林議云漢業特起不因緣堯宜以高帝配天魏高
堂隆議以舜配天蔣濟云漢時奏議謂堯已禪舜不得
為漢祖舜亦已禪禹不得為魏之祖今宜以武皇帝配
天晉宋因循即為前式又案禮及孝經援神契並云明
堂有五室天子每月於其室聽朔布教祭五帝之神配
以有功德之君大戴禮記曰明堂者所以明諸侯尊卑

也許慎五經異義曰布政之宮故稱明堂明堂盛貌也
周官匠人職稱明堂有五室鄭玄云周人明堂五室帝
一室也初不聞有文王之寢鄭志趙商問云說者謂天
子廟制如明堂是為明堂即文廟耶鄭答曰明堂主祭
上帝以文王配耳猶如郊天以后稷配也袁孝尼云明
堂法天之宮本祭天帝而以文王配配其父於天位則
可牽天帝而就人鬼則非義也泰元十三年孫耆之議
稱郊以祀天故配之以后稷明堂以祀帝故配之以文

王由斯言之郊為皇天之位明堂即上帝之廟徐邈謂配之為言必有神主郊為天壇則堂非文廟史記云趙綰王臧欲立明堂于時亦未有郊配漢又祀汾陰五時即是五帝之祭亦未有郊配議者或謂南郊之日已旅上帝若又以無配而特祀明堂則一日再祭於義為贖案古者郊本不共日蔡邕獨斷曰祠南郊祀畢次北郊又次明堂高廟世祖廟謂之五供馬融云郊天之祀咸以夏正五氣用事有休有王各以其時兆以方郊四時

合歲功作相成亦以此月總旅明堂是則南郊明堂各
日之證也近代從省故與郊同日猶無煩黷之疑何者
其為祭雖同所以致祭則異孔晁云言五帝佐天化育
故有從祀之禮旅上帝是也至於四郊明堂則是本祀
之所譬有功臣從饗豈復廢其私廟且明堂有配之時
南郊亦旅上帝此則不疑於共日今何故致嫌於同辰
又禮記天子祭天地四方山川五祀歲徧尚書堯典咸
秩無文詩云昭事上帝聿懷多福據此諸義四方山川

猶必享祀五帝大神義不可畧魏文帝黃初二年正月

郊天地明堂明帝太和元年正月以武皇帝配天文皇

帝配上帝然則黃初中南郊明堂皆無配也又郊日及

牲色異議紛然郊特牲云郊之用辛周之始郊也盧植

云辛之為言自新絜也鄭玄云用辛日者為人當齋戒

自新絜也漢魏以來或丁或巳而用辛常多考之典據

辛日為允郊特牲又云郊牲幣宜以正色繆襲據祭法

云天地駢犢周家所尚魏以建丑為正牲宜尚白白虎

通云三王祭一用夏正所以然者夏正得天之數也魏
用異朔故牲色不同今大齊受命建寅創厯郊廟用牲
一依晉宋謂宜以今年十月殷祀宗廟自此以後五年
再殷來年正月上辛有事南郊宜以共日還祭明堂又
用次辛饗祀北郊而並無配犧牲之色率有舊章

二郊明堂議

四年世祖即位其秋有司奏尋前代嗣位或
仍前郊年或別始晉宋以來未有畫一今年
正月己郊未審明年應南北二郊祀明堂與
不依舊通闕八座丞郎博士議尚書令王儉

議尚書領國子祭酒張緒
等十七人並同儉議詔可

案秦為諸侯雜祀諸時始皇并天下未有定祠漢高受
命因雜四時而起北時始祠五帝未定郊丘文帝六年
新垣平議初起渭陽五帝廟武帝初至雍郊見五時後
常三歲一郊祠雍元鼎四年始立后土祠於汾陰明年
立太一祠於甘泉自是以後二歲一郊與雍更祠成帝初
即位丞相匡衡於長安定南北郊哀平之際又復甘泉
汾陰祠平帝元始五年王莽奏依匡衡議還復長安南

北二郊光武建武二年定郊祀兆於洛陽魏晉因循率由漢典雖時或參差而類多間歲至於嗣位之君參差不一宜有定制檢晉明帝太寧五年南郊其年九月崩成帝即位明年改元即郊簡文咸安二年南郊其年七月崩孝武即位明年改元亦郊宋元嘉三十年正月南郊其年二月崩孝武嗣位明年改元亦郊此則二代明例差可依放謂明年正月宜饗祀二郊虔祭明堂自茲厥後依舊間歲

日蝕不廢社祠議

永明元年十二月有司奏今月三日臘祠太社稷一日合朔日蝕既在致齋內未審于社祠無疑不曹檢未有前准尚書令王儉議詔可

禮記曾子問天子嘗禘郊社五禮之祭簠簋既陳唯大喪乃廢至於當祭之日火日蝕則停尋伐鼓用牲由來尚矣而簠簋初陳問所不及據此而言致齋初日仍值薄蝕則不應廢祭又初平四年士孫瑞議以日蝕廢社而不廢郊朝議從之王者父天親地郊社不殊此則前

准謂不宜廢

南郡王昭業冠議

永明五年十月有司奏南郡王昭業冠求儀注未有前准尚書令王儉議僕射王奐等十
四人議並同并換立
贊冠醺酒二辭詔可

皇孫冠事歷代所無禮雖有嫡子嫡孫然而地居正體
下及五世今南郡王體自儲暉實惟國裔元服之典宜
異列蕃案士冠禮主人立冠朝服賓加其冠贊者結纓
鄭玄云主人冠者之父兄也尋其言父及兄則明祖在

父不為主也大戴禮記公冠篇云公冠自為主四加玄冕以卿為賓此則繼體之君及帝之庶子不得稱子者也小戴禮記冠義云冠于阼以著代也醺于客位三加彌尊加有成也注稱嫡子冠於阼庶子冠于房記又云古者重冠故行之于廟所以自卑而尊先祖也據此而言彌與鄭注儀禮相會是故中朝以來太子冠則皇帝臨軒司徒加冠光祿贊冠諸王則郎中加冠中尉贊冠今同于儲皇則重依于諸王則輕又春秋之義不以父

命辭王父命禮父在斯為子君在斯為臣皇太子居臣
子之節無專用之道南郡雖處蕃國非支庶之列宜稟
天朝之命微申冠阼之禮晉武帝詔稱漢魏遣使冠諸
王非古正典此蓋謂庶子封王合依公冠自主之義至
於國之長孫遣使惟允宜使太常持節加冠大鴻臚為
贊醮酒之儀亦歸二卿祝醮之辭附准經記別更撰立
不依蕃國常體國官陪位拜賀自依舊章其日内外二
品清官以上詣止車集賀并詣東宮南門通賤別日上

禮宮臣亦詣門稱賀如上臺之儀既冠之後尅日謁廟以弘尊祖之義此既大典宜通闕八座丞郎并下二學詳議

公府長史朝服議

宋後廢帝元徽四年上
議為沈侯之所駁遂寢

春秋國語云貌者情之華服者心之文巖廊盛禮衣冠為大是故軍國異容內外殊序而自頃承用每有乖違府職掌人教四方是則臣居毘佐志在當官永言先典

載懷夕惕按晉令公府長史官品第六銅印墨綬朝服
進賢兩梁冠掾屬官品第七朝服進賢一梁冠晉官表
注亦與令同而今長史掾屬但著朱服而已此則公違
明文積習成謬謂宜依舊制長史兩梁冠掾屬一梁冠
並同備朝服中單韋舄率由舊章若所上蒙允并請班
司徒二府及諸儀同三府通為永準又尋舊事司徒公
府領步兵者職僚悉同降朝不領兵者主簿祭酒中單
韋舄並備令史以下唯著玄衣今府既開公謹遵此制

其或有署臺位者立服為宜按令稱謹有兼官皆從重
官之例尋內官為重其署臺位者悉宜著位之服不在
立服之例若署諸卿寺位兼府職者雖三品而卿寺為
卑則宜依公府立衣之制服章事重禮儀所先請臺詳
服

又議

自頃服章多闕有違前準近議依今文被報不宜改革
又稱左丞劉議按令文凡有朝服今多闕亡然則文存

服損非唯鉉佐用捨既久即為舊章如下旨伏尋皇宋
受終每因晉舊制律令條章同規在昔若事有宜必合
懲改則當上闕詔書下由朝議縣諸日月垂則後昆豈
得因外府之乖謬以為盛宋之興典用晉氏之律令而
謂其儀為積法哉順違從失非所望於高議申明舊典
何改革之可論又左丞引令史之闕服以為鉉佐之明
比夫名位不同禮數異等令史從省或有權宜達官簡
畧為失彌重又主簿祭酒備服於王庭長史掾屬朱衣

以就列於是倫比自成矛盾此而可忍孰不可安將引
令以遵舊臺據失以為例研詳符旨良所未譬當官而
行何強之有制令昭然守以無貳

帝后諱議

建元元年太常上朝

堂諱訓僕射王儉議

后諱依舊不立訓禮天子諸侯諱羣祖臣隸既有從敬
之義宜為太常府君諱至於朝堂榜題本施至極既迨
尊所不及禮降於在三晉之京兆宋之東安不列榜題

孫毓議稱京兆列在正廟臣下應諱而不上榜宋初博
士司馬道敬議東安府君諱宜上榜何承天執不同即
為明據其有人名地名犯太常府君及帝后諱者皆
改宣帝諱同二名不偏諱所以改承明門為北掖以榜
有之字與承並東宮承華門亦改為宣華云

冕旒議

依漢三公服山龍九章卿華蟲七章

皇后遷祔祭奠議

建元四年高帝山陵昭皇后應遷祔祠部疑有祖祭及遣啟諸奠九飯之儀不左僕射王儉議從之

奠如大歛賀循云從墓之墓皆設奠如將葬廟朝之禮
范甯云將窆而奠雖不稱為祖而不得無祭

奠墓設虞議

有司又奏昭皇后神主在廟今遷祔葬葬有虞以安神神既已處廟改葬出靈豈應虞祭鄭注改葬云從廟之廟禮宜同從墓之墓事何容異前代謂應無虞左僕射王儉議從之

范甯云葬必有魂車若不為其歸神將安舍世中改葬

即墓所施靈設祭何得不祭而毀也賀循云既窆設奠於墓以終其事雖非正虞亦粗相似晉氏修復五陵宋朝敬后改葬皆有虞今設虞非疑

皇太子妃服議

建元二年皇太子妃薨前宮臣疑所服左僕射王儉議從之

禮記文王世子父在斯為子君在斯為臣且漢魏以來宮僚充備臣隸之節具體在三昔庾翼妻喪王允滕弘謂府吏宜有小君之服況臣節之重耶宜依禮為舊君

妻齊衰三月居官之身並合屬假朝晡臨哭悉繫東宮
今臣之未從官在遠者於居官之所屬寧二日半仍行
喪成服遺牋表不得赴

太子妃建銘旌議

太子妃斬草乘黃議

建銘旌僕射王儉議

禮既塗棺祝取銘置于殯東大歛畢便應建于西階之
東

太子迎車駕議

穆妃薨成服日車駕出臨喪朝議
疑太子應出門迎左僕射王儉議

尋禮記服問君所主夫人妻太子嫡婦言國君為此三
人為主喪也今鑒輿臨降自主喪而至雖因事撫慰
義不在吊南郡以下不應出門奉迎但尊極所臨禮有
變革權去杖經移立戶外足表情敬無煩止哭皇太子
既一宮之主自應以車駕幸宮依常奉候既當成服之
日吉凶不相干宜以衰幘行事望拜止哭率繇舊章尊
駕不以臨弔奉迎則惟常體求之情禮如為可安

太子妃旒翬議

宋大明二年太子妃薨建九旒有司又議斬
草日建旒與不若建旒應幾旒及畫龍升降
云何又用幾翬僕

射王儉議從之

旒本是命服無關於凶事今公卿以下平存不能備禮
故在凶乃建耳東宮秩同上公九命之儀妃與儲君一
體義不容異無緣末同常例別立凶旒大明舊事是不
經詳議率爾便行耳今宜考以禮典不得效尤從失吉
部伍自有衿輅凶部別有銘旌若復立旒復置何處翬

自用八

穆妃朔望設祭議

有司奏穆妃卒哭後靈還在道遇朔望當須設祭否王儉議時議從之

既虞卒哭祭之於廟本是祭序昭穆耳未全同卒吉四時之祭也所以有朔望殷事蕃國不行權制宋江夏王妃卒哭以後朔望設祭帝室既以卒哭除喪無緣方有朔望之祭靈筵雖未升廟堂而舫中即成行廟猶如桓玄及宋高祖長沙臨川二國並有移廟之禮豈復謂靈

筵在途便設殷事耶推此而言朔望不復俟祭宋懿后時舊事不及此益可知

穆妃祥議

建元三年有司奏皇太子穆妃以去年七月薨其年閏九月數閏為應以閏附正月若用月數數閏者南郡王兄弟便應以此四月晦小祥至于祥月不為有疑不左僕射王儉議

三百六旬尚書明義文公納幣春秋致譏穀梁云積分而成月公羊云天無是月雖然左氏謂告朔為得禮是故先儒咸謂三年朞喪歲數沒閏大功以下月數數閏

夫閏者蓋是年之餘日而月之異朔所以吳商云舍閏以正晷允協情理今杖晷之喪雖以十月而小祥至于祥縞必須周歲凡厭屈之禮要取象正服祥縞相去二月厭降小祥亦以則之又且求之名義則小祥本以年限考之倫例則相去必應二朔今以厭屈而先祥不得謂此事之非期事既同條情無異貫沒閏之理固在言先設令祥在此晦則去縞三月依附准例益復為礙謂應須五月晦乃祥此國之大典宜其精詳并通闕八座

丞郎研盡異同

答褚淵難

尚書令褚淵難儉議曰厭屈之典由所尊奪情故祥編備制而年月不申今以十一月而祥從期可知既計以月數則應數閏以成典若猶舍之何以異於編制疑者正以祥之當閏月數相縣積分餘閏歷象所弘計月者數閏故有餘月計年者苞含故致盈積稱理從制有何不可儉答淵難隨事解釋祠部郎中王珪之議謂喪以閏施功衰以下小祥值閏則畧而不言今雖厭祥名猶存異於餘服計月為數屈追慕之心以遠為通日既餘分月非正朔舍而全制於情唯允僕射儉議理據詳博謹所附同今司徒淵始雖疑難再經往

反未同儉議依舊八座丞郎通常博議為允
以來五月晦小祥其祥禫自依常限奏御班
下內外
詔可

含閏之議通儒所難但祥本應期屈而不遂語事則名
體俱存論哀則情無異迹雖數月義實計年閏是年之
歸餘故宜總而苞之期而兩祥緣尊故屈祥則沒閏象
年所申屈申兼著二途具舉經紀之旨其在茲乎如使
五月小祥六月乃閏則祥之去縞事成二月是為十一
月以象前期二朔以放後歲名有區域不得相參魯襄

二十八年十二月乙未楚子卒唯書上月初不言閏此
又附上之明義也鄭射王賀唯云期則沒閏初不復區
別杖期之中祥將謂不俟言矣成休甫云大祥後禫有
閏別數之明杖期之祥不得方於綏縞之末即恩如彼
就例如此

荅王遂問

皇太子穆妃服尚書左丞兼著作郎王遂問
左僕射王儉中軍南郡王小祥應待聞喜不
穆妃七月二十四日薨聞喜公八月發哀計
十一月之限應在六月南郡王為當同取六

月則大祥復申一月應用八月非復正月在
存親之義若各自為祥廬壘相間玄素相糅
未審當有此疑不司徒褚淵等二十
人並同儉議為允請以為永制詔可

送往有已復生有節罔極非服制所申祥縞明示終之
斷相待之義經記無聞世人多以廬室衰麻不宜有異
故相去一二月者或申以俱除此所謂任情徑行未達
禮旨昔撰喪記已嘗言之遠還之人自有為而未祭在
家之子立何辭以不變禮有除喪而歸者此則經記之
遺文不待之明據假使應待則相去彌年亦宜必待乃

為衰經永服以窮生吉蠲長絕于宗廟斯不可矣苟曰
非宜則旬月之間亦不容申何者禮有倫序義無徒設
今遠則不待近不相須禮例既乖即心無取若疑兄弟
同居吉凶舛雜則古有異宮之義設無異宮則遠還之
子自應開立別門以終喪事靈筵祭奠同在家之人再
晷而毀所以然者奔喪禮云為位不奠鄭玄云以其精
神不存乎此也聞哀不時寔緣在遠為位不奠益有可
安此自有為而然不闕嫡庶庶子在家亦不待嫡矣而

況儲妃正體王室中軍長嫡之重天朝又行權制進退
彌復非疑謂不應相待中軍祥縞之日聞喜致哀而已
不受弔慰及至忌辰變除昆弟亦宜相就寫情而不對
客此國之大典宜通闕八座丞郎共盡同議然後奏御
君母服議

建元三年太子穆妃薨南郡王聞
喜公國臣疑制君母服儉又議

禮庶人為國君齊衰先儒云庶人在官若府史之屬是
也又諸侯之大夫妻為夫人服總衰七月以此輕微疎

遠故不得盡禮今皇孫自是蕃國之王公太子穆妃是
天朝之嫡婦宮臣得申小君之禮國官豈敢為夫人之
敬當單衣白帢素帶哭於中門外每臨輒入與宮官同
入學釋奠議

齊武帝永明三年春詔立學創立堂宇召公
卿子弟下及員外郎之胤凡學生二百人其
年秋中悉集有司奏宋元嘉舊事學生到先
釋奠先聖先師禮又有釋菜未詳今當行何
禮用何樂及禮器尚書令王儉上議其
冬皇太子講孝經親臨釋奠車駕幸聽

周禮春入學舍菜合舞記云始教皮弁祭菜示敬道也

又云始入學必祭先聖先師中朝以來釋菜禮廢今之所行釋奠而已金石俎豆皆無明文方之七廟則輕比之五禮則重陸納車屑謂宣尼廟宜依亭侯之爵范甯欲依周公之廟用王者儀范宣謂當其為師則不臣之釋奠日備帝王禮樂此則車陸失於過輕二范傷於太重喻希云若至王者自設禮樂則肆賞於至敬之所若欲嘉美先師則所況非備尋其此說守附情理皇朝屈尊弘教待以師資引同上公即事惟允元嘉立學裴松

之議應舞六佾以郊樂未具故權奏登歌今金石已備
宜設軒縣之樂六佾之舞牲牢器用悉依上公

褚淵拜錄議

高帝崩遺詔以淵為錄尚書事江左以來無
單拜錄者有司疑立優策尚書令王儉議從
之

見居本官別拜錄應有策書而舊事不載中朝以來三
公王侯則優策並設官品第二策而不優優者褒羨策
者兼明尚書職居天官委寄政化之本故尚書令品雖

第三拜必有策錄尚書品秩不見而總任彌重前代多與本官同拜故不別有策即事緣情不容均之凡僚宜有策書用申隆寄既異王侯不假優文

司空掾屬為褚淵服議

淵改授司空薨掾屬以淵未拜疑應為吏敬不王儉議

依禮婦在塗聞夫家喪改服而入今掾屬雖未服勤而吏節稟於天朝宜申禮敬

司徒府史為褚淵服議

司徒府史又以淵既解職而未恭
後授府猶應上服以不佞又議

依中朝士孫德祖從樂陵遷為陳留未入境樂陵郡吏
依見君之服陳留迎吏依娶女有吉日衰齊弔司徒府
宜依官制服

史條例議

建元二年初置史官檀超與驃騎記室江淹
掌史職上表立條例開元紀號不取宋年封
爵各詳本傳無假年表立十志律歷禮樂天
文五行郊祀刑法藝文依班固朝會與服依
蔡邕司馬彪州郡依徐爰百官依范曄合州
郡班固五星載天文日蝕載五行改日蝕入

天文志以建元為始帝女體自皇宗立傳以備甥舅之重又立處士列女傳詔內外詳議

左僕射王儉議詔日月

災隸天文餘如儉議

金粟之重八政所先食貨通則國富民實宜加編錄以
宗務本朝會志前史不書蔡邕稱先師胡廣說漢舊儀
此乃伯喈一家之曲碎小儀無煩錄宜立食貨省朝會
洪範九疇一曰五行五行之本先乎水火之精是為日
月五行之宗也今宜憲章前軌無所改革又立帝女傳
亦非淺識所安若有高德異行自當載在列女若止於

常美則仍舊不書

奏

諒闇親奉蒸嘗奏

南齊高帝建元四年尚書令王

儉採晉中朝諒闇議奏從之

權典既行喪禮斯奪事興漢世而源由甚遠殷宗諒闇
非有服之稱周王即吉唯宴樂為譏春秋之義嗣君踰
年即位則預朝會聘享焉左氏云凡君即位卿出並聘
踐修舊好又云諸侯即位小國聘焉以繼好結信謀事

補闕禮之大者至於諒闇之內而圖婚三年未終而吉
禘齊歸之喪不廢蒐杞公之卒不徹樂皆致譏貶以明
鑒戒自斯而談朝聘蒸嘗之典卒哭而備行婚禮蒐樂
之事三載而後舉通塞興廢各有自然又案大戴禮記
及孔子家語並稱武王崩成王嗣位明年六月既葬周
公冠成王而朝于祖以見諸侯命祝雍作頌襄十五年
十一月晉侯周卒十六年正月葬晉悼公平公既即位
改服修宮烝于曲沃禮記曾子問孔子曰天子崩國君

薨則取群廟之主而藏諸祖廟禮乎卒哭成事而後主
各反其廟春秋左氏傳凡君卒哭而祔祔而後特祀於
主蒸嘗禘於廟先儒云特祀於主者特以喪禮奉新亡
者至於寢則不同於古蒸嘗禘於廟者卒哭成事羣廟
之主各返其廟則四時之祭皆即吉也三年喪畢吉禘
於廟躋羣主以定新主也凡此諸議悉著在經誥昭乎
方冊所以晉宋因循同規前典卒哭公除親奉蒸嘗率
禮無違因心允協爰至泰豫元年禮官立議不宜親奉

乃引三年之制自天子達又據王制稱喪三年不祭唯祭天地社稷越紼而行事曾不知自天子達本在至情既葬釋除事以權奪委衰襲哀孝享宜申越紼之旨事施未葬卒哭之後何紼可越復依范宣之難杜預譙周之論士祭竝非明據晉武在喪每欲存寧戚之懷不全依諒闇之典至於四時蒸嘗蓋以哀疾未堪非便頓改舊式江左以來通儒碩學所歷多矣守而弗革義豈徒然又宜即心而言公卿大夫則負宸親臨三元告始則

朝會萬國雖金石輟響而篋簾充庭情深於恒哀而跡降於凡制豈曰能安國家故也宗廟蒸嘗孝敬所先寧容吉事備行斯典獨廢就令必宜廢祭則應三年永闕乃復同之他故有司攝禮進退二年彌乖典衷謂宜依舊親奉

啟

先郊後春啟

南齊武帝永明元年當南郊而立春在郊後世祖欲遷郊尚書令王儉啟從之

案禮記郊特牲云郊之祭也迎長日之至也大報天而主日也易說三王之郊一用夏正盧植云夏正在冬至後傳曰啟蟄而郊此之謂也然則圜丘與郊各自行不相害也鄭玄云建寅之月晝夜分而日長矣王肅曰周以冬祭天於圜丘以正月又祭天以祈穀祭法稱燔柴太壇則圜丘也春秋傳曰啟蟄而郊則祈穀也謹尋禮傳二文各有其義盧王兩說有若合符中朝省二丘以并二郊即今之郊禮義在報天事兼祈穀既不全以祈

農何必俟夫啟蟄史官唯見傳義未達禮旨又尋景平
元年正月二日辛丑南郊其月十一日立春元嘉十六
年正月六日辛未南郊其月八日立春此復是近世明
例不以先郊後春為嫌若或以元日合朔為礙者則晉
成帝咸康元年正月一日加元服二日親祠南郊元服
之重百僚備列雖在致齋行之不疑今齋內合朔此即
前准若聖心過恭寧在嚴潔合朔之日散官備防非預
齋之限者於止車門外別立幔省若日色有異則列於

省前望實為允謂無煩遷日

請江敷還本啟

初宋明帝敕敷出繼從叔慤為從祖淳後于是僕射王儉啟尚書參議謂問世立後禮無其文荀顗無子立孫墜禮之始何期又立此論義無所據于是敷還本家

禮無後小宗之文近世緣情皆繇父祖之命未有既孤之後出繼宗族也雖復臣子一揆而義非天屬江忠簡肩嗣所寄唯敷一人傍無眷屬敷宜還本若不欲江孫絕後可以敷小兒繼孫為孫

章

拜儀同三司章

臣聞日中則昃盈虛之定分器滿必傾往事之恒理遂
乃班同衮章變和台曜外叅論道內總百司物議惟塵
自識非據

牋

與豫章王嶷牋

舊楚蕭條仍歲多故荒民散亡

南史作政
荒人散

寔須緝理公

臨蒞甫爾英風惟穆江漢來蘇八荒慕義八荒一作八州自庾

亮以來荊州

一作楚

無復此美

南史無美字

政古人云期月有

成而公旬日成化

一作致治

豈不休哉

書

荅陸澄

易體微遠實貫群籍施孟異聞周韓殊旨豈可專據小

王便為該備

一作輔

依舊存鄭高同來說元凱注傳超邁

前儒若不列學官其可廢矣賈氏注經世所罕習穀梁

小書無俟兩注存糜畧范率由舊式凡此諸義並同雅
論疑孝經非鄭所注僕以此書明百行之首寔人倫所
先七畧藝文並陳之六藝不與蒼頡凡將之流也鄭注
虛實前代不嫌意謂可安仍舊立置

經義問答

曲禮問答

永明五年冬太子臨國學親臨策試諸生於坐問少傅
王儉曰曲禮云無不敬尋下之奉上可以盡禮上之接

下慈而非敬今總同敬名將不為昧儉曰鄭玄云禮主
于敬便當是尊卑所同太子曰若如來通則忠惠可以
一名孝慈不須別稱儉曰尊卑號稱不可悉同愛敬之
名有時相次忠惠之異誠以聖旨孝慈互舉竊有徵據
禮云不勝喪比於不慈不孝此則其義太子曰資敬奉
君資愛事親兼此二塗唯在一極今乃移敬接下豈復
在三之義儉曰資敬奉君必同至極移敬逮下不慢而
已太子曰敬名雖同深淺既異而文無差別彌復增疑

儉曰繁文不可備設畧言深淺已見傳云不忘恭敬民之主也書云奉先思孝接下思恭此又經典明文互相起發

周易問答

太子問王儉曰周易乾卦本施天位而說卦云帝出乎震震本非天義豈相當儉曰乾健震動天以運動為德故言帝出震太子曰天以運動為德君自體天居位震雷為象豈體天所出儉曰主器者莫若長子故受之以

震萬物出乎震故亦帝所與焉

孝經問答

儉又詰太子曰孝經仲尼居曾子侍夫孝理弘深大賢方盡其致何故不授顏子而寄曾生太子曰曾生雖德慙體二而色養盡禮去物尚近接引非隔弘宣規教義在于此儉曰接引非隔弘宣雖易去聖轉遠其事彌輕既云人能弘道將恐人輕道廢太子曰理既有位不容以人廢言而況中賢之才弘上聖之教寧有壅塞之嫌

贊

竟陵王山居贊

升堂踐室金暉玉朗疊疊大韶遙遙閑賞道以德弘聲
由業廣義重寶歸情深虛往濠梁在茲安事遐想

碑文

太宰文簡褚彥回碑文

夫太上有立德其次有立功此之謂不朽所以子產云
亡宣尼泣其遺愛隨武既沒趙文懷其餘風於文簡公

見之矣公諱淵字彥回河南陽翟人也微子以至仁開
基宋段以功高命氏爰逮兩漢儒雅繼及魏晉以降奕
世重暉乃祖太傅元穆公德合當時行比州壤深識臧
否不以毀譽形言亮采王室每懷沖虛之道可謂婉而
成章志而晦者矣自茲厥後無替前規建官惟賢軒冕
相襲公稟川嶽之靈暉含珪璋而挺曜和順內凝英華
外發神茂初學業隆弱冠是以仁經義緯敦穆于閨庭
金聲玉振寥亮于區宇孝敬淳深率由斯至盡歡朝夕

人無間言逍遙乎文雅之囿翱翔乎禮樂之場風儀與
秋月齊明音徽與春雲等潤韻宇弘深喜愠莫見其際
心明通亮用人必猶於已汪汪焉洋洋焉可謂澄之不
清撓之不濁袁陽源才氣高竒綜覈精裁宋文帝端明
臨朝鑒賞無昧袁既延譽於遐邇文亦定昏於皇家選
尚餘姚公主拜駙馬都尉漢結叔高晉婚武子方斯茂
如也釋褐著作佐郎轉太子舍人濯纓登朝冠冕當世
升降兩宮實惟時寶具瞻之範既著台衡之望斯集出

參太宰軍事入為太子洗馬俄遷祕書丞贊道槐庭司
文天閣光昭諸侯風流籍甚以父憂去職喪過乎哀幾
將毀滅有識留感行路傷情服闋除中書侍郎王言如
絲其出如綸恪居官次智效惟穆于時新安王寵冠列
蕃越敷邦教毘佐之選妙盡國華出為司徒右長史轉
尚書吏部郎執銓以平御煩以簡裴楷清通王戎簡要
復存於茲太始之初入為侍中曾不移朔遷吏部尚書
是時天步初夷王途尚阻元戎啟行衣冠未緝內贊謀

謨外康流品制勝既遠涇渭斯明賞不失勞舉無失德
績簡帝心聲敷物聽事寧領太子右衛率固讓不拜尋
領驍騎將軍以帷幄之功膺庸祇之秩封雩都縣開國
伯食邑五百戶既秉辭梁之介又懷寢丘之志所受田
邑不盈百井久之重為侍中領右衛將軍盡規獻替均
山甫之庸緝熙王旅兼方叔之望丹陽京輔遠近攸則
吳興襟帶實惟股肱頻作二守並加蟬冕政以禮成民
是以息明皇不豫儲后幼沖貽厥之寄允屬時望徵為

吏部尚書領衛尉固讓不拜改授尚書右僕射端流平衡
外寬內直弘二八之高謨宣由庚而垂詠太宗即世遺命以
公為散騎常侍中書令護軍將軍送往事居忠貞允亮
秉國之均四方是維百官象物而動軍政不戒而備公
之登泰階而尹天下君子以為美談亦猶孟軻致欣於
樂正羊職悅賞於士伯者也丁所生母憂謝職毀疾之
重因心則至朝議以有為為之魯侯垂式存公忘私方
進明準爰降詔書敦還攝任固請移歲表奏相望事不

我與屈已弘化屬值三季在辰戚藩內侮桂陽失圖窺
窬神器鼓棹則滄波振蕩建旗則日月蔽虧出江派而
風翔入京師而雷動鳴控弦於宗稷流鋒鏃於象魏雖
英宰臨戎元渠時殄而餘黨寔繁宮廟憂逼公乃摠熊
羆之士率不貳心之臣戮力盡規克寧禍亂康國祚於
綴旒拯王維於已墜誠由太祖之威風抑亦仁公之翼
佐可謂德刑詳禮義信戰之器也以靜難之功進爵為
侯兼授尚書令中軍將軍給班劔二十人功成弗有固

秉撝挹改授侍中中書監護軍如故又以居母艱去官
雖事緣義感而情均天屬顏丁之合禮二連之善喪亦
曷以踰天厭宋德水運告謝嗣主荒怠於天位強臣憑
陵於荆楚廢昏繼統之功戡亂寧民之德公實仰贊宏
規參聞神筭雖無受脤出車之庸亦有甘寢秉羽之績
乃作司空山川攸序兼授將軍戎政輯睦既而齊德龍
興順皇高禪深達先天之運匡贊奉時之業弼諧允正
歲猷弘遠樹之風聲著之話言亦猶稷契之臣虞夏荀

裴之奉魏晉自非坦懷至公永監宗替孰能光輔五君

寅亮二代者哉大啟南康爰登中鉉時膺土宇固辭邦

教今之尚書令古之冢宰雖秩輕於衮司而任隆於百

辟輒遂冲旨改授朝端邇無異言遠無異望帝嘉茂庸

重申前冊執五禮以正民簡八刑而罕用故能聘績康

衢延慈哲后義在資敬情同布衣出陪鑾躅入奉帷殿

仰南風之高詠餐東杼

一作野

之祕寶雅議於聽政之晨

披文於宴私之夕參以酒德間以琴心曖有餘暉遙然

留想君垂冬日之溫臣盡秋霜之戒肅肅焉穆穆焉於
是見君親之同致知在三之如一太祖升遐綢繆遺寄
以侍中司徒錄尚書事稟玉几之顧奉綴衣之禮擇皇
齊之令典致聲化于雍熙內平外成實昭舊職增給班
劔三十人物有其容徽章斯允位尊而禮卑居高以思
降自夏徂秋以疾陳退朝廷重違謙光之旨用申超世
之尚改授司空領驃騎大將軍侍中錄尚書如故景命
不永大漸彌留建元四年八月二十一日薨于私第春

秋四十有八昔柳莊疾棘衛君當祭而輟禮晏嬰既往
齊君趨車而行哭公之云亡聖朝震悼於上群后恒慟
于下豈非哀纏一國痛深一主而已哉追贈太宰侍中
錄尚書如故給節羽葆鼓吹班劍為六十人謚曰文簡
禮也夫乘德而處萬物不能害其貞虛已以游當世不
能擾其度均貴賤於條風忘榮辱於彼我然後可兼善
天下聊以卒歲經始圖終式免祗悔誰云克備公實有
焉是以義結君子惠霑庶類言象所未形述詠所不盡

故吏某甲等感逝川之無捨哀清暉之眇默餐輿誦於
丘里瞻雅詠於京國思衛鼎之垂文想晉鍾之遺則方
高山而仰止刊玄石以表德其辭曰

辰精感運昴靈發祥元首惟明肱股惟良天鑑璿曜踵
武前王欽若元輔體微知章永言必孝因心則友仁洽
兼濟愛深善誘觀海齊量登嶽均厚五臣茲六八元斯
九內謨帷幄外曜台階遠無不肅邇無不懷如風之偃
如樂之諧光我帝典緝彼民黎率禮蹈謙諒實身幹跡

屈朱軒志隆衡館眇眇玄宗萋萋辭翰義既川流文亦
霧散嵩構云頽梁陰載缺德猷靡嗣儀形長逝怛悵餘
歲鏘洋遺烈久而彌新用而不竭

連珠

暘連珠

蓋聞王佐之才雖遠豈必見採於當世凌雲之氣徒盛
無以自致于雲間是故魏人指玉於外野和氏泣血于
荆山

哀策

高帝哀策文

并序

降階執禮泣血纏心感客臺之罷御哀恭館之不臨仰
神儀而邈絕視區物而悽陰俾茲良史敬修舊則敢圖
鴻規式揚至德其辭曰

靈源遙裔肇惟商丘聖功寧夏賢識歸周我皇踵武超
冠前猷美風允迪德音孔修月准敷仁日精表孝則地
均和體天合炤外弘三至內隆七教水祀將傾乾維晦

象韋弁長襲鼓磬屬響聲化已淪政刑遂往國圖靡緝
民規載爽康世以德撥亂資武威以雷霆潤以風雨六
術允昭四義克舉自東徂北遐方即叙功被河濟化隆
江漢帝謨仰式王維佇幹改步藩屏來登翼贊綢繆總
章因循陽館昔在保衡君違斯政爰茲博陸亦鑒靈命
效昏以忠登明資敬義煥金石功昭舞詠蠢爾荆漢悖
亂人經謀連樞禁兵接神垵禦姦以惠禦宄以刑獻捷
宗寢飲至王庭政教雲行嶽猷天造山鑑紫璇苑茂朱

草玉檢騰暉金繩薦寶天鏡既穆地維既肅遐邇壹體
表裏禔福乃眷斯民昧旦杼軸興文偃武纘禹舊服所
向惟簡所保惟賢居尊彌約無善不延膠章載緝風軌
克宣上洞清儀下達玄泉聽覽閑日應物餘景怡慮以
文棲心以靜鴻章晨映薇言夕永迹庇區服情深箕穎
萬寓殮和百神受職梁甫欣儀云亭望式輔德伊何淹
捐民極嵩岳長傾宸暉斯旻機炤惟寂達鑒靡傷慎終
敬始知微知彰立言垂範玉潤金相瞻仰遺式哀結流

霜旋玉軼之皦鏡動雲旗之逶迤振哀笳于八極響清
蹕于咸池顧應掖而稍遠視機衡而長離風遲遲而懷
暮日惜惜其若垂感衣冠于喬岳追弓劍之在斯悼丁
年之薄祐訴窮心于兩儀

皇太子妃哀策文

肇惟初職芳猷夙就翩翻禮園徘徊樂園視秋齊明方
春等茂伊宋之季天衢薦阻咨我儲貳締縉江許衛女
事齊樊姬贊楚美著嬪嗣徽音踵武數盈則反否極斯

昌肅膺靈命經緯三光往儀衡館來式椒堂訓組咸事
象服有章八演仰則六幽望景悠悠草昧如何不永方
中委曜先秋落穎世有遺塵庭無餘影嗚呼哀哉遵三
兆之嘉日迨九筮之靈期澄金波而映鑒旆命飛廉而
拂瓊輜揚清笳于漢表動嘶挽于雲基

詩

侍皇太子釋奠宴

禮惟國幹義實民端身由業澡世以教安金鎔乃器水

術伊瀾漸芳則馥履永固寒瞽宗務時類宮善誘咨此
含生躋彼仁壽淳移雅缺歷茲永久遊藝莫師獨學誰
友三兆戒辰八鸞警旦風動蒿宮雲棲參館禮邁仁周
樂超英漢神保爰格祝史斯贊鬱鬯既終德馨是與降
冕上庠升晏東序槐宰金貞藩維玉譽時彥莘莘國胄
楚楚

侍太子九日宴玄圃詩

明明儲后沖默其量徘徊禮樂優游風尚微言外融幾

神內王就日齊暉儀雲等望本茂條榮源澄流潔漢稱
間平周云魯衛咨我藩華方軌前軌秋日在房鴻雁來
翔寥寥清景靄靄微霜草木搖落幽蘭獨芳眷言淄苑
尚想濠梁既暢旨酒亦飽歲猷有來斯悅無遠不柔

贈徐孝嗣

婉婉遊龍載遊載東靡靡行雲並躍齊蹤無類不感有
來斯雍之子云邁嗟我莫從歲云暮止述職戒行崇蘭
罷秀孤松獨貞悲風宵遠東雁晨征撫物遐想念別書

情

春日家園

徙倚未云暮，陽光忽已收。
羲和無停晷，壯士豈淹留。
冉冉一作荏苒老將至，功名竟不修。
稷契匡虞夏，伊呂翼商周。
撫躬謝先哲，解紱歸山丘。

春詩二首

蘭生已匝苑，萍開欲半池。
輕風搖雜蘼，細雨亂叢枝。

其二

風光承露照霧色點蘭暉青蕖結翠藻黃鳥弄春飛

春夕

露華方照歲雲彩復經春虛閨稍疊草幽帳日凝塵

後園餞從兄豫章

茲夕竟何夕念別開曾軒光風轉蘭蕙流月泛虛園

失題

方軌并茂追清彥輔柔亦不如剛亦不吐

南郊樂歌

高德宣烈樂

饗帝嚴親則天光大
鳥奕前古榮鏡無外
日月宣華卿雲流靄
五漢同休六幽成泰

太廟樂歌

高德宣烈樂

悠悠草昧穆穆經綸
乃文乃武乃聖乃神
動龕危亂靜比斯民
誕膺休命奄有八紘
握機肇運光啟禹服
義滿天淵禮昭地軸
澤靡不懷威無不肅
戎夷竭歡象來致

福偃風裁化昨日敷祥信星含曜鉅草流芳七廟觀德
六樂宣章惟先惟敬是享是將

穆德凱容樂

太姒嬪周塗山儷禹我后嗣徽重規疊鉅肅肅閔宮翔
翔雲舞有享德馨無絕終古

明德凱容樂

多難固業殷憂啓聖帝宗纘武維時執競起柳獻祥百
堵興詠義雖祀夏功符受命遠無不懷邇無不肅其儀


濟濟其容穆穆赫矣君臨昭哉嗣服允王惟后膺此多
福禮以昭事樂以感靈八簋陳室六舞充庭觀德在廟
象德是形四海來祭萬國咸寧

齊白紵辭

陽春白日風花香趨步明月舞瑤裳情發金石媚笙簧
羅袿徐轉紅袖揚清歌流響繞鳳梁如驚若思凝且翔
轉盼流精艷輝光將流將引雁雙行歡來何晚意何長
明君馭世永歌昌



漢魏六朝百三家集卷七十五



總校官庶吉士臣侍朝

校對官檢討臣王坦修

謄錄監生臣王錫壽

欽定四庫全書薈要

集部

漢魏六朝百三家集卷七十六

詳校官候選知縣臣吳甸華




欽定四庫全書薈要卷一萬九千六百六十五

集部

漢魏六朝百三家集卷七十六

明 張溥 輯

王融集

賦

風賦

奄兮日采之既移忽兮歷景之將馳靡輕筠之碧葉汎
會松之翠枝總高羽而蕭瑟韻珠露之參差此烈士之

英風長寥亮其如斯

桐樹賦應竟陵王敎

梧桐生矣於邱岫之會隈儀龍門而插幹佇鳳羽以抽
枝蹤楚宮而留稱藉溜館以翻聲直不繩而特秀圓匪
規而天成同歲草以萎暮共辰物而滋榮豈遠心以自
外寧有志於孤貞

疏

上北伐圖疏

臣聞情愔自中事符則感象構於始機動斯彰莊敬之道可宗會揖讓其彌肅勇烈之士足貴應輦鐸以增思肇植生民厥詳既緬降及興運維道有徵莫不有所因循而升皇業者也若夫膏腴既稱天乙知五方之富皮幣已列帝劉測四海之尊異封禪之文則升中之典攸鬯歎興地之圖乃席捲之庸是立伏惟陛下窮神盡聖總極居中偶化兩儀均明二曜拯玄綱於頽絕反至道於澆淳可謂區宇儀刑齊民先覺者也臣亦遭逢生此

嘉運鑿飲畊食自幸唐年而識用昏靈經術疎淺將邁
且軸豈蕨與薇皇鑒燭幽天高聽下賞片言之或善矜
一物之失時湔拂塵蒙霑飾光價拔足草廬廁身朝序
復得拜賀歲時瞻望日月於臣心願會已畢矣但千祀
一逢休明難再思策鉛駕樂陳涓塹竊習戰陳攻守之
術農桑牧藝之書申商韓墨之權伊周孔孟之道常願
待詔朱闕俯對青蒲請閑宴之私談當世之務位賤人
微徒深傾款方今九服清怡三靈和晏木有附枝輪無

異轍東靺獻舞南籥傳歌羌蹙踰山秦屠越海舌象翫
委體之勤輜譯厭瞻巡之數固將開桂林於鳳山創金
城於西守而蠹爾獫狁敢讎大邦假息關河竊命函谷
淪故京之爽塏變舊邑而荒涼息及玷之儒衣久伊川
之被髮北地殘民東都遺老莫不茹泣吞悲傾耳戴目
翹心仁政延首王風若試馳咫尺之書具甄戎旅之卒
徇其墜城納其降虜可弗勞弦鏃無待干戈真皇王之
兵征而不戰者也臣乞以執殳先邁式道中原澄瀚渚

之恒流掃狼山之積霧係單于之頸屈左賢之膝習呼
韓之舊儀拜鑾輿之巡幸然後天移雲動勒封岱宗咸
五登三追蹤七十百神肅警萬國具僚璿弁星離玉帛
雲聚集三燭於蘭席聆萬歲之禎聲豈不盛哉豈不韙
哉昔桓公志在伐莒郭牙審其幽趣魏后心存去漢德
祖究其深言臣愚昧忖誠不足以知微然伏揆聖心規
模弘遠既圖載其事必克就其功臣不勝歡喜

議給虜書疏

虜使遣求書朝議欲
不許融上疏請許之

臣側聞僉議疑給虜書如臣愚情切有未喻夫虜僻處
遐方狼猛蜂毒暴悖天經虧違地義逋竄燭幽去來幽
朔綿周漢而不悛歷晉宋其踰梗豈有愛敬仁智恭讓
廉修致馬牛之殊風同鷹虎之反目設橐糗有儲筋竿
足用必以草竊闕燧寇擾邊疆寧容款塞卑辭承衣請
朔陛下務存遵養不時侮亡許其膜拜之誠納裘之賁
況復願同文軌儻見款遣思奉聲教方致猜拒將使舊

邑遺逸未知所寘衰胡餘噍或能自推一令蔓草難鉏
涓流泛酌豈直疥癢輕痾容為心腹重患抑孫武之言
也困則數罰窘則多賞先暴而後畏其衆者虜之謂乎
前中原士庶雖淪懾殊俗至於婚葬之晨猶巾禭為禮
而禁令苛刻動加誅輟于時獯粥初遷犬羊尚結即心
徒怨困懼成逃自其將卒奔離資峙銷闕北畏勅蠕西
逼南胡民背如崩勢絕防斷於是曲從物情偽竊章服
歷年將絕隱蔽無聞既南向而泣者日夜以覲北顧而

辭者江淮相屬凶謀歲窘淺慮無方於是稽顙郊門問
禮求樂若來之以文德賜之以副書漢家軌儀重臨畿
輔司隸傳節復入關河無待八百之師不期十萬之衆
固其提漿佇俟揮戈願倒三秦大同六漢一統又虜前
後奉使不專漢人必介以匈奴備諸覘獲且設官分職
彌見其情抑退舊苗扶任種戚師保則后族馮晉國總
錄則邾姓直勒渴侯台鼎則丘頽苟仁端執政則目凌
鉗耳至於東都羽儀西京簪帶崔孝伯程虞蚪久在著

作李元和郭季祐上于中書李思沖飾虜清官游明根
泛居顯職今經典遠被詩史北流馮李之徒必欲遵尚
直勒等類居致乖阻何則匈奴以氈騎為帷床馳射為
糒糧冠方帽則犯沙陵雪服左袵則風驟鳥逝若衣以
朱裳戴之玄冕節其揖讓教以翔趨必同艱桎梏等懼
冰淵婆娑蹶躓困而不能前已及夫春草水生阻散馬
之適秋風木落絕驅禽之歡息沸脣於桑墟別醞乳於
冀俗聽韶雅如隴賸臨方丈若爰居馮李之徒固得志

矣虜之凶族其如病何於是風土之思深復戾之情動
拂衣者連裾抽鋒者比鏃部落爭於下酋渠危於上我
一舉而兼吞卞莊之勢必也且棘寶薦虞晉疆彌盛大
鍾出智宿氏以亡帝略遠乎無思不服鑾光幸岱匪暮
斯朝臣請收籍伊瀍茲書復掌猶取之內府藏之外籙
於理有愜即事何損若狂言足採請決敕施行

請習校部曲疏

臣每覽史傳見憂國忘家捐生報德者未嘗不撫卷歎

息以為今古共情也。然或以片言微感一食小惠，參國士之眄，同布素之遊耳。豈有如臣獨拔無聞之伍，過超非分之位，名器雙假，榮祿兩升，而宴安旻罷之晨，優游盱食之日，所以敢布丹愚，仰聞宸聽。今議者或以西夏為念，臣竊謂之不爾。其故何哉？陛下聖明，羣臣悉力，順以制逆，上而御下，指開賞黜之言，微示生死之路。方域之人，皆相為敵。既兵威遠臨，人不自保，雖窮鳥必咏，固等命於梁鷄，困獸斯驚。終並懸於厨鹿，凱師勞飲，固不

待晨臣之寸心獨有微願自獫狁薦食荒侮伊瀍天道
禍淫危亡日至母后內難兵力外虛謠言物情屬當今
會若藉巫漢之歸師騁士卒之餘憤取函谷如反掌陵
關塞若摧枯但士非素蓄無以即用不教民戰是實棄
之特希私集部曲豫加習校若蒙垂許乞隸監省拘食
人身權備石頭防衛之數臣少重名節早習軍旅若試
而無績伏受面欺之誅用且有功仰訓知人之哲

表

拜祕書丞謝表

臣聞升離戒晨陰牆不照其景膚雲停夕幽草或漏其
津至如明蕪就日澤深行雨不有聖德誰或其然所以
欽至道而出青臯捨布衣而望朱闕懷祿仕在代耕期
榮不謀入用豈悟特擢之例事均延祖置左之恩任光
元幹踰溢情涯普燭身表畏翹車而必讓誠濡翼之願
辭既聖主謂其可施故愚臣默思自勉

為王儉讓國子祭酒表

竊以庠均義重振古所崇資師道尊有來攸尚匪曰蘭
芷疇變入室之情不自朱藍何遷素絲之質況臣仁慙
富侶德謝潤身識陋令經器非匣重何以昇墜道於殊
年反斯交於遙日將使良璣修竹無增瑩羽敬遜務時
遂騫星歲

又

臣聞修瓦方湛弱露霑而取覆懸衡紀正輕塵委而必
移況臣才非應俗用乖知治取其集冰飲水旌懸輪驚

方臣之念未足言矣

獄中據答表

囚竇頌蔽觸行多讐但夙忝門素得奉教君子爰自總
髮迄將立年州閭鄉黨見許愚慎朝廷衣冠謂無疊咎
過蒙大行皇帝獎育之恩又荷文皇帝識擢之重司徒
公賜預士林安陸王曲垂眄接既身被國慈必欲以死
自効前後陳伐虜之計亦仰簡先朝今段大羊乍擾紀
僧真奉宣先敕賜語北邊動靜令囚草撰符詔于時即

因啟聞希侍鑒輿及司徒宣敕招募同例非一實以戎
事不小不敢承教續蒙軍號賜使招集銜敕而行非敢
虛扇且格取亡叛不限僉楚狡弄聲勢應有形迹專行
權利又無贓賄反覆脣齒之間未審悉與誰言傾動頗
舌之內不容都無彼此但聖主膺教實所沐浴自上甘
露頌及銀甕啟三日詩序接虜使語辭竭思稱揚得非
誹謗且王公百司唯賢是與高下之敬等秩有差不敢
踰溢豈應訛毀因才分本劣謬被策用悚忤之情夙宵

兢惕未嘗誇示里閭彰曝遠邇自循自省並愧流言良
由緣淺寡虞致貽囂謗伏惟明皇臨宇普天蒙澤戊寅
赦恩輕重必宥首日曠期始蒙旬日一介罪身獨嬰憲
劾若事實有微爰對有在九死之日無恨泉壤

策問

永明九年策秀才文五首

問秀才高第明經朕聞神靈文思之君聰明聖德之后
體道而不居見善如不及是以崆峒有順風之請華封

致乘雲之拜或揚旌求士或設簾待賢用能敷化一時
餘烈千古朕夤奉天命恭惟永圖審聽高居載懷祇懼
雖言事必史而象闕未箴寤寐嘉猷延佇忠實子大夫
選名升學利用賓王懋陳三道之要以光四科之首鹽
梅之和屬有望焉

又問昔周宣情千畝之禮虢公納諫漢文缺三推之義
賈生直言良以食惟民天農為政本金湯非粟而不守
水旱有待而無遷朕式照前經寶茲稼穡祥正而青旗

肅事土膏而朱紘戒典將使杏花菖葉耕獲不愆清
冷風述遵無廢而釋耒佩牛相訟莫反兼貧擅富浸以
為俗若爰井開制懼驚擾愚民鴻鹵可腴恐時無史白
興廢之術矢陳厥謀

又問議獄緩死大易深規敬法卹刑虞書茂典自氓俗
澆弛法令滋彰肺石少不寃之民棘林多夜哭之鬼朕
所以明發動容晨食興慮傷秋荼之密網惻夏日之嚴
威永念晝冠緬追刑厝徒以百鑊輕科反行季葉四支

重罰爰創前古訪遊禽於絕澗作霸秦基歌鷄鳴於闕
下稱仁漢牘二途如爽即用兼通昌言所安朕將親覽
又問聚人曰財次政曰貨泉流表其不匱懋遷通其有
無既龜貝積寢緡纒專用世代茲多銷漏參倍下貧無
兼辰之業中產闕游歲之貲惟瘼卹隱無捨矜歎上帝
溥臨賜朕休寶卽斜之谷開而出銅且有後命事茲鎔
範充都內之金紹園府之職但赤仄深巧學之患榆莢
難輕重之權開塞所宜悉心以對

又問治歷明時昭遷革之運改憲勅法審刑德之原分
命顯於唐官文條炳於鄒說及岨夷廢職昧谷虧方漢
秉素祗之徵魏稱黃星之驗紛諍空軫疑論無歸朕獲
纂洪基思弘至道庶令日月休徵風雨玉燭克明之旨
弗遠欽若之義復還於子大夫何如哉其驪翰改色寅
丑殊建別白書之

永明十一年策秀才文五首

問秀才朕秉籙御天握樞臨極五辰空撫九序未歌至

於思政明臺訪道宣室若墜之惻每勤如傷之念恒軫
故恤貧緩賦省徭慎獄幸四境無虞三秋式稔而多黍
多稌不興兩穗之謠無褐無衣必盈七月之歎宣布政
未優將疲民難業登爾於朝是屬宏議罔弗同心以匡
厥辟

又問惟王建國惟典命官上叶星象下符川嶽必待天
爵具修人紀咸事然後公才授職揆務分司是以五正
置於朱宣下民不忒九工開於黃序庶績其凝周官三

百漢位兼倍歷茲以降游惰實繁若閑冗畢棄則橫議
無已冕笏不澄則坐談彌積何則可修善詳其對

又問昔者賢牧分陝良守共治下邑必樹其風一鄉可
以為績至有旦撫鳴琴日置醇酒文而無害嚴而不殘
故能出人於阡危之域躋俗於仁壽之地是以賈誼有
言下之有惡吏之罪也頃深汰珪符妙簡銅墨而春雉
未馴秋螟不散入在朕前湊其智略出連城守闕爾無
聞豈薪樵之道未弘為網羅之目尚簡悉意正辭無侵

執事

又問朕聞上智利民不迷於禮大賢彊國罔圖惟舊豈
非療飢不期於鼎食拯溺無待於規行是以三王異道
而共昌五霸殊風而並烈今農戰不修文儒是競棄本
徇末厥弊滋多昔宋臣以禮樂為殘賊漢主比文章於
鄭衛豈欲非聖無法將以既道而權今欲專士女於耕
桑習鄉閭以弓騎五都復而事庠序四民富而歸文學
其道奚若爾無面從

又問自晉氏不綱關河蕩析宋人失馭淮汴崩離朕思
念舊民永言攸濟故選將開邊勞來安集加以納款通
和布德修禮歌皇華而遣使賦膏雨而懷賔所以關洛
動南望之懷撫夷遽北歸之念夫危葉畏風驚禽易落
無待干戈聊用辭辯片言而求三輔一說而定五州斯
路何階人誰或可進謀誦志以沃朕心

啟

求自試啟

臣聞春庚秋蟀集候相悲露木風榮臨年共悅夫惟動
植且或有心況在生靈而能無感臣自奉望宮闕沐浴
恩私拔迹庸虛參名盛列纓劍紫複趨步丹墀歲時歸
來誇榮邑里然無勤而官昔賢曾議不任而祿有識必
譏臣所用慷慨憤懣不遑自安誠以深恩鮮報聖主難
逢蒲柳先秋光陰不待貪及明時展悉愚効以酬陛下
不世之仁若微誠獲信短才見序文武更法惟所施用
夫君道含弘臣術無隱翁歸乃居中自見克國曰莫若

老臣竊景前脩敢蹈輕節以冒不媒之鄙式罄奉公之誠抑又唐堯在上不參二人管夷吾恥之臣亦恥之願陛下裁覽

法門頌啟

伏以迦文啟聖道冠百靈常住置言理高萬乘神儀挺發非望雲就日所追睿識獨尊豈生明弱言能企鹿苑金輪弘汲引以濟俗鶴林雙樹顯究竟以開氓惜乎祇園滅影驚岳淪光微辭既遙大義如綴自不宣游十地

擁接九區豈有導覺水之塞源極法雲於落仞明公覽
四諦之必空悟三業之暫有應務屈已則仁兼旦爽隨
方申道則慧一淨名驅率土於福林入蒼黔於正術

謝勅賜御裘等啟

雲衣降授仙裾曲委榮振素里澤駭蓬心昔漢帝解裘
不獨前寵曹王褫帶復降今恩

謝勅賜米啟

臣無王陽之術計然之智不能負粟百里分地一廛上

虧溫養自取飢切豈悟外恩橫集天私妄委

謝竟陵王示法制啟

翔慧燭於昏塗灑法水於塵路至夫澄心洗累之規莊
情束影之制解網出界之訓滅惑淨照之旨固以行首
霜威字端風厲信可以糟滓五書糠粃百氏升罩聃周
筭竿尼旦所謂窺七澤而狹潢汙登太山而小天下

謝竟陵王示扇啟

竊以六翮風流五明氣重若比圓綃有魚玩寶輕踰雪

羽潔竝霜文子淑賞其如規班姬儷之明月豈直魏王
九華漢臣百綺況復動製聖衷垂言烟戒載摹聽眎式
範樞機

謝竟陵王賜納裘啟

降飾自尊垂綈及賤玄玉不純曾波奪采南陸方永北
風日壯無衣無褐發念聖衷而挾纊之間每流解裘之
賜偏委

謝司徒賜紫鮮啟

東越水羞寔罄東時之美南荆任土方揖鮓魚之最

謝武陵王賜弓啟

殿下摘藻蕙樓暢藝蘭苑敷積玉於風筵疊連珠於月
的兔圍掩秀鄴水慚奇融揖讓未工濫陪升飲之賞操
弧反正繆奉招賢之錫文韜鏤景逸幹捎雲玩濫百齡
佩流千載

謝安陸王賜銀鉢啟

素金之貴有訪仙經鐫刻可奇見符神鼎撤膳器於珍

羞之席降寶玩於簞瓢之門

書

為竟陵王與隱士劉虬書

玉燭登年金商在律炎涼始貿動靜惟安勤味道腴幸
遵雅尚豈不樂哉僕誠幸甚百姓一心衆生不疾比屋
可封將又何求但良書獨擁善談無析願言之子實痼
我心所以不遠千里尺書道意自淳清既辨澆漓代襲
隱顯之術參差默語之途紛互或飾智以警愚或激情

以悟俗或穢已以闇通或謬歌以明道屠羊駟馬未足
磷其堅佯狂如愚豈能緇其白官楚蕃魏人外之氣逾
邈入漢游梁區中之韻彌少及推其輕重品其得失則
淵懷洞賞寧或符之僕夙養閒襟長慕出概迹塵珪組
心逸江湖末面自親聞風如舊而迴駕之念徒軫式閭
之禮無階固已佇軸深衷傾筐遐路者矣君矯然獨遠
確乎難拔素志與白雲同悠高情與青松共爽宣習質
文緇林枯而重蕘昭辨空有連河壅而復滔所謂忘言

之人可論天人之際豈能鳳舉鶴翻有心儀羣高踰愛
海比榮禪衢沾濠射之冥游屈祗鷺之法侶闡三乘於
窮子發二諦於困蒙有是因也何其暢歟今皇風具穆
至道弘被四海不溢五嶽無塵膠序肇修經法敷廣人
賤璣璫家習禮讓樵蘇必時郊林全鬱量網有節鱗羽
偕翔至於層山絕澗還帶畿畎膏田沃野亘望廡躔信
可以招往隱淪栖集勝寄故文舉築室治城之阿次宗
植援西山之趾葛洪考槃於海岫釋遠肥遁於鍾幽每

踐其遺蹤輒深九原之歎若高步可遷復何懷乎四子
昔宣尼之見伯雲師利之往維摩豈不知相忘之道哉
諒有以也未叙之間為道自愛一二令凌琚之口具

序

三月三日曲水詩序

臣聞出豫為象鈞天之樂張焉時乘既位御氣之駕翔
焉是以得一奉宸逍遙襄城之域體元則大悵望姑射
之阿然睿眇寂寥其獨適者已至如夏后兩龍載驅璿

臺之上穆滿八駿如舞瑤水之陰亦有饗云固不與萬
民共也我大齊之握機創厯誕命建家接禮貳宮考庸
太室幽明獻期雷風通饗昭華之珍既徙延喜之玉攸
歸革宋受天保生萬國度邑靜鹿丘之歎遷鼎息大垵
之慙紹清和於帝猷聯顯懿於王表駿發開其遠祥定
爾固其洪業皇帝體膺上聖運鍾下武冠五行之秀氣
邁三代之英風昭章雲漢暉麗日月牢籠天地彈壓山
川設神理以景俗敷文化以柔遠澤普汜而無私法舍

弘而不殺猶且具明廢寢晷晷忘餐念負重於春水懷
御奔於秋駕可謂巍巍弗與蕩蕩誰名秉靈圖而非泰
涉孟門其何險儲后睿哲在躬妙善居質內積和順外
發英華斧藻至德琢磨令範言炳丹青道潤金壁出龍
樓而問豎入虎闌而齒胄愛敬盡於一人光耀究於四
海若夫族茂麟趾宗固磐石跨蹏昌姬韜軼炎漢元宰
比肩於尚父中鉉繼踵乎周南分陝流勿翦之歡來仕
允克施之譽莫不如珪如璋令問令望朱弗斯皇室家

君王者也本枝之盛如此稽古之政如彼用能免羣生
於湯火納百姓於休和草萊樂業守屏稱事引鏡皆明
目臨池無洗耳沈寔之怨既缺邁軸之疾已消興廉舉
孝歲時於外府署行議年日夕於中甸協律總章之司
序倫正俗崇文成均之職導德齊禮挈壺宣夜辨氣朔
於靈臺書笏珥彤紀言事於仙室褰帷斷裳危冠空履
之吏影搖武猛扛鼎揭旗之士勤恤民隱糾逖王慝射
集隼於高墉繳大風於長隧不仁者遠惟道斯行讒莠

茂聞攘爭掩息稀鳴桴於砥路鞠茂草於園扉耆年闕
市井之游稚齒豐車馬之好宮隣昭泰荒憬清夷侮食
來王左言入侍離身反踵之君髻首貫胸之長屈膝厥
角請受纓縻文鉞碧帑之琛竒幹善芳之賦紈牛露犬
之玩乘黃茲白之駟盈衍儲邸克羽郊虞甌牘相尋鞮
譯無曠一尉候於西東合車書於南北暢轂埋轡轡之
轍綏旌卷悠悠之旆四方無拂五戎不距偃革辭軒銷
金罷刃天瑞降地符升澤馬來器車出紫脫華朱英秀

佞枝植歷草滋雲潤星暉風揚月至江海呈象龜龍載

文方握河沈璧封山紀石邁三五而不追踐八九之遙
迹功既成矣世既貞矣信可以優游暇豫作樂崇德者
歟于時青鳥司開條風發歲粵上斯已惟暮之春同律
克和樹草自樂禊飲之日在茲風舞之情咸蕩去肅表
乎時訓行慶動於天矚載懷平圃乃睠芳林芳林園者
福地輿區之湊丹陵若水之舊殷殷均乎姚澤撫撫尚
於周原狹豐邑之未宏陋譙居之猶褊求中和而經處

揆景緯以裁基飛觀神行虛檐雲構離房乍設層樓間
起負朝陽而抗殿跨靈沼而浮榮鏡文虹於綺疏浸蘭
泉於玉砌幽幽叢薄秩秩斯干曲拂迴瀾逕復新
萍泛沚華桐發岫雜天采於柔荑亂嚶聲於縣羽禁軒
承幸清宮侯宴緹帷宿置帟幕宵懸既而滅宿澄霞登
光辨色戒道執爰展軫效駕徐鑾警節明鐘暢音七萃
連鑣九旂齊軌建旗拂蜺揚葭振木魚甲煙聚貝胄星
羅重英曲瑤之飾絕景追風之騎昭灼甄部駟駿函列

虎視龍超雷駭電逝轟轟隱隱紛紛軫軫羌難得而稱
計爾乃迴輿駐罕嶽鎮淵停睟容有穆賓儀式序授几
肆筵因流波而成次蕙肴芳醴任激水而推移葆侑陳
階金匏在席戚奏翹舞籥動邠詩召鳴鳥於弇州追伶
倫於嶰谷發參差於王子傳妙靡於帝江清歌有闕羽
觴無筭上陳景福之賜下獻南山之壽信凱讌之在藻
知和樂於食苹桑榆之陰不居草露之滋方渥有詔曰
今日嘉會咸可賦詩凡四十有五人其辭云爾

頌

淨行頌三十一首

皇覺辨德篇頌

紫實昧朱狂斯濫哲舛逕揚鑣分源競柰麗景或幽澄
舒每缺水激波生湮深火滅情端徒總理向空徹不有
明心誰驅聖轍

開物歸信篇頌

生浮命舛識罔情違業雲結影慧日潛暉逶迤修道極

夜無歸登山小魯泛海難沂參珉見璧辨礫知璣迷其
未遠匪正何依

滌除三業篇頌

樂由生滅患以身全業資意造事假言筌利名畢倚榮
辱茲纏燕驪匪躡周錯徒鐫惑端風緒愛境旌懸不勤
一至何階四禪

修理六根篇頌

傾都麗佳繞梁之曲肥馬輕裘蕙肴芳醪晦黑滋生昏

器競欲貌蕩魂浮身甘意觸靈龜攝根晴葵衛足蟲草
或虞人如不勗

生老病死篇頌

穠華易遷繁蕉不實星髮鮐肌鄰光惕日二豎潛言十
巫空衛生之往矣高松蕭瑟即化翻靈從緣墜質噓臍
有譏嗟然何汨

尅責身心篇頌

瞻彼進德莫敢惑遑顧咨小智徒以大康豈無通術跋

此榛荒雖有重離迹照螢光循情內負撫事外傷層羅
一舉空念高翔

檢覆三業篇頌

渾風緬沒旅俗膠加競丈內疾誰覲心瑕再惟情反三
省身華貴危窮濫貧懾豪奢遄迴六蔽紛綸七邪不圖
厥始逸馬難置

訶詰四大篇頌

迅矣百齡綿茲六入出沒昏疑興居愛習矻矻子求營

營爾給匪德日歸惟殃斯集貪人敗類無厭自及昭回
不希玄墟何泣

出家順善篇頌

澡身浴德晦迹埋名將安寶地誰留化城道場曠謚禪
逕閒清風瓢弗響震瞰徒驚嘯傲焉慮脫落何營長捐
有結永寘無生

在家從惡篇頌

石磨則磷玉生雖堅維居必徙豈曰能賢永開春日蘭

敗秋年教隨類反習乃情遷命符三漏生偕十纏茲焉
遂往憂畏方延

沈冥地獄篇頌

冥津殊復曉高聽亦能卑陰牆雖兩密幽夜有四知炎
山翻烈火冰澗市寒澌羅城振雲幕鋒樹鬱霜枝茹荼
非云苦集木豈稱危求仁曾已得長歎欲何為

出家懷道篇頌

韞石諒非真飾瓶信為假竊服臯門上濫吹溜軒下鳳

祀徒驚心騶交終好野實相豈或照浮榮未能捨迹殊
冠冕客事襲驅馳者已矣歇鄭聲無然亂周雅

在家懷善篇頌

處塵貴不染被褐重懷珠美玉曜幽石曾蘭挺叢芻四
氏不為侶三界豈能渝諒茲親愛染寧以財利拘煩流
捨智寶榛路坦夷途萬物竟何匹烈火樹紅芙

三界內苦篇頌

心怨動紛遶情怡輒遷互歡愛一離遠傷憂坐衰暮連

幌結清陰高臺起風露腐毒緣芳旨天伐實修嘯慙網
必虧生繁置或全免眇眇夜何期悠悠終肯悟

出三界外樂篇頌

端襟測煩海矯步寫埃氛三受猶絕雨八苦若浮雲輸
心仰圓極罄質委方墳朝遊淨國侶暮集靈山羣燈祇
開違照香字薦嘉薰俛首睇人俗信矣靜為君

斷絕疑惑篇頌

生塗非一理識緒固饒津徒駭東陵富空嗟北郭貧國

生曾已戾顏氏信為仁逢尤昭往業習善會茲身勤憂
永夷泰晏安終苦辛合名且云重豈若樹良因

十種慚愧篇頌

神膏施惟重玄酒恩未隆明璣隋水上潤玉藍田中稟
天性所極資敬道攸崇羽毛共以勢輪軌相為通報德
愴前雅酬言愛餘風遵途每多舛顧省能無忤

極大慚愧篇頌

冬孤理豐毳春蠶緒輕絲形骸翻為阻心識還自欺華

容羈卯日生平少年時驅車追俠客酌酒弄妖姬但念
目前好安知身後悲惕然一以愧永與情愛辭

善友獎勸篇頌

蘭室改蓬心梅崖變伊草丹青有必渝絲礫豈常皓曲
轅且繩直詭木遂雕藻一簣或成山百里倦中道隆漢
乃王臣失楚信元保勉矣德不孤至言匪虛造

戒法攝心篇頌

金山嚴寶仞瓊琬烈瑤萸牆狐議不窟檐鷗豈能棲淨

花莊思序慧沼盥身倪六羣倘未一七衆固恒齊端儀
有直景正道無傾蹊維宮超以悟襄野竟何迷

自慶畢故止新篇頌

春非我春秋非秋一經長夜每悠悠陶形練氣住元造
啟蒙夷阻出重幽榮公三樂非為曠箕生五福豈能求
靈姿妙境往難集微言至道此云修年逢生幸曾以慶
盈愆貳過倘知憂畢故斷新別苦海希賢庶善憑智流

大忍惡對篇頌

春山之下玉抵禽漢水之陽璧千金清業神居德非重
潔已愚侶道已深愛憎喜怒生而習榮華芳旨世所欽
鴻才巨力萬夫敵誰肯制此方寸心逸驥狂兕獷不御
繁羈密桺儻能禁遣情遺事復何想寂然無待恣幽尋
緣境無礙篇頌

恍象惚物終不名龍舉鸞集竟誰辯絕智亡身孰為礙
韜名戢曜故能顯匪日匪月灼以懸安飛安翔虛而踐
璧石無間恣出沒水火有性任舒卷敷教應俗驚泉流

現迹依方迅風轉大哉超世莫與羣希轅慕舜宜自勉
一志努力篇頌

像北二山尚有移河中一洲亦可為精誠必至霜塵下
意氣所感金石離有子刺掌修名立王生擢髮美譽垂
自來勤心少騫墜何不努力出憂危勝幡法鼓繁且擊
智師道衆紛以馳有常無我儼既列無明有縛孰能窺
禮舍利寶塔篇頌

越人鑄金誠有思魏后粧木亦云悲中賢小節猶可戀

去聖彌遠情彌滋祇樹蕭條多宿楚王宮寂寞遺基
設像居室若有望間儀駐景暖如之連卿共日獨先後
道悠命舛將無時傾懷結想惻以慕乖靈寫照拂塵疑
敬重正法篇頌

出不自戶將何由行不以法欲焉脩之燕入楚待駿足
陵河越海寄輕舟仁言為利壯已博聖道弘濟邈難求
通明洞燭煥曾景深凝廣潤湛淵流翼善開賢敷教義
照蒙啟惑滌煩憂功成弗有名弗居淡然無執與化遊

奉養僧田篇頌

五玉已潤談而信八桂雖芳風乃掃妙理至言唯聖寶
不自伊人孰弘道照空觀法識遷流撫俗瞻光厭生老
絕滅情嗜斷懽怡縱落豪華棄雕藻親愛倏忽信風煙
財利悠悠若塵草測以龍雲豈曰高濯足江漢更慚皓
勸請增進篇頌

俟河之清逢聖朝靈智俯接一其遙白日馳光不流照
葵藿微志徒傾翹遍盈空有盡三界綿塞宇宙罄八遼

德光業遠升至覺寂寞常住獨能超煎灼欲火思雲露
沈汨使水望舟橋弘慈廣度昔有誓法輪道御且徐鑣
隨喜萬善篇頌

聞善若已燭良書見賢思齊美通誥感幽動地孝有誠
殞首流腸忠為操振禮摛文弘憲則機謀颺勇靜姦暴
明白八素志沖聞高論窮微契神奧捐軀濟物不邀名
輕財貴義豈期報百行萬善紛塗軌求誠罄想畢歡蹈
迴向佛道篇頌

悠悠九土各異形擾擾四俗非一情驅車秣馬徇世業
市交鬻義銜虛名三墨紛紜殊不會七儒委鬱曾未并
吉凶拘忌迺數術取與離合實縱橫朝日夕月竟何取
投巖赴火空捐生咄嗟失道爾迴駕沔彼流水趣東瀛
發願莊嚴篇頌

心所期兮彼之岸何事浮俗久淹迨照慧日兮駕法雲
騰危城兮出塵館芳珠燦兮聞歲時寶樹颺兮警昏旦
清露搏甘永以挹喜園流采常為玩無待殷鼎方丈差

安用秦箏纖指彈勒誠歎願長不渝習苦塵勞從此捍
哀策文

皇太子哀策文

繡幕啟塗銅池從殯葆鐸既行枚縉且引皇帝痛染盛
之闕奉哀七鬯之有亡憫含嗟乎宗正顧掩歆於承光
式睠元良永懷人寶俾茲史策載餘風道其辭曰

居辰北極在日重離誕惟妙善克自生知資神為契合
聖如規地維缺位月紀訐期哀纏晦朔燧改歲時饘粥

不溢薑桂無滋俛終心禮昌我帝基思皇下武纘戎上
德將叶人神永貽家國用稽嗣典實弘儲則庸器改物
綴號宗名往辭綠蓋來馭朱纓旂旗旖旎鸞燾聲明守
器宣華訪安永福上漏驂軒初晨戒服慶色伊滿黃儀
載肅至誠莫感遐福空辭氛程月志侵動年司素娥犯
列青雲失滋中楹軫夢當戶陳詩楚藥毀方秦鑿反轍
高議虛演奇文徒說遠賓上靈長違昭世痛結宸慈哀
震華棣嗚呼哀哉軒帷高寂庭帳深陰鶴闕晝掩鳧燈

夜沈仍襲未改客饌如臨暖徽儀而可慕標嗣子之純
心嗚呼哀哉韋弁告期麻衣請日辯域展圖揚龜獻吉
文物充階具僚在側總葭挽之哀淒視風煙之騷瑟嗚
呼哀哉飾麾輅而南指轉旌羽而北徂車結軫於雕轂
馬緩節於金蘇寄靈心於萬象增戀戀於國都嗚呼哀
哉光徙靡而欲沈山荒涼而遂晚城闕緬而何期平原
忽而超遠情有望而弗追顧如疑於將反嗚呼哀哉

墓銘

豫章王墓銘

傾袖傾淪人剛弛沒半嶽摧峰中河墜月眷然曉隧如
何夜臺鯨駭枕慕葆吹徘徊千秋萬祀顧有餘哀

永嘉長公主墓銘

作儀阿媛取儷漢妃相金陋質穠李慚輝肅穆婦容靜
恭女德顧史求箴披圖問則慶善郁夷與仁冥默宵燧
亡明曉挽已聲松門嚴濶泉帳寒清悠哉白日鬱彼佳
城

樂府

齊明王歌辭七首

應司徒教作
以下五言

明王曲

明王日月照至樂天地和幸息雲門吹復歇咸池歌桂
序金匏轉瑤軒絲石羅朱騏步躑躅元鶴舞蹉跎露凝
嘉草秀煙度醴泉波皇基方萬祀齊民樂如何

聖君曲

聖君應昌歷景祚啟休期龍樓神睿道兔園仁義基海

蕩萬川集山崖百草滋盤苗成萃止渝鞋異來思清明
動離軫咸惠被殊辭大哉君為后何羨唐虞時

淥水曲

湛露改寒司交鶯變春旭瓊樹落晨紅瑤塘水初淥日
霽沙澈明風泉動華燭遵渚泛蘭觴乘漪弄清曲斗酒
千金輕寸陰百年促何用盡歡娛王度式如玉

採菱曲

炎光銷玉殿涼風吹鳳樓雕輜一作青輅僚平隰采櫂泊安

流金華妝翠羽鷁首畫飛

一作龍

舟荆姬採菱曲越女江

南謳騰聲翻葉靜散響谷雲浮良時時一遇佳人難再求

清楚引

平原數千里飛觀鬱岩岩清月回將曙浩露零中宵轉
葉度沙海別羽自冰遼四面通寒色左右竟嚴飈崑崙
多榛梗京索久塵曲逝將憑神武奮劍蕩遺妖

長歌引

周雅聽休明齊德觀升平紫煙四時合黃河萬里清翠
柳蔭通街朱闕臨高城方轂雷塵起接袖風雲生酣笑
爭日夕絲管互逢迎徂年無促慮長歌有餘聲

散曲

金枝湛明燎繡幕裂芳然層閣橫綠綺曠席緬朱纒楚
調廣陵散瑟柱秋風弦輕裙中山麗長袖邯鄲妍徐歌
駐行景迅節淪浮煙言願聖明主永永萬斯年

三婦艷詩

大婦織綺羅中婦織流黃小婦獨無事挾瑟上高堂丈人且安坐調弦詎未央

青青河畔草

容容寒煙起翹翹望行子行子殊未歸寤寐君

一作若

容

輝夜中心愛促覺後阻河曲河曲萬里餘情交襟袖疎珠露春華返璿霜秋照

一作桂

晚入室怨蛾眉情歸為誰

婉

同沈右率諸公賦鼓吹曲二首

巫山高

諸公詩別見謝
沈二集此不載

想像

一作
髣髴

巫山高薄暮陽臺曲煙霞乍舒卷蘅芳自斷

續彼美如可期寤言紛在矚憮然坐相思秋風下庭綠

芳樹

相望早春日煙華雜如霧復此佳麗人含情結芳樹綺
羅已自憐暄風多有趣去來徘徊者佳人不可遇

臨高臺

遊人欲騁望積步上高臺井蓮當夏吐窓桂逐秋開花

飛低不入鳥散遠時來還看雲棟影含月共徘徊

望城行

金城十二重雲氣出表裏萬戶如不殊千門反相似車
馬若飛龍長衢無極已簫鼓相逢迎信哉佳城市

法樂辭十二首

天長命自短世促道悠悠禪衢開遠駕愛海亂輕舟累
塵曾未極心樹豈能籌情埃何用洗正水有清流

右歌本起

百神肅以虔三靈震且越恒曜揜芳宵薰風動蘭月丹
榮藻玉墀翠羽文珠闕皓毳非虛來交輪豈徒發

右歌靈瑞

韶年春已仲明星夜未央千祀鍾休厯萬國會嘉祥金
容涵夕景翠鬢佩晨光表塵維淨覺汎俗迺輪皇

右歌下生

襲氣變離宮重柝驚層殿曼響感心神修容轉懽宴生
老終已縈死病行當薦方為淨國遊豈結危城戀

右歌在宮

春枝多病天秋葉少欣榮心骸終委滅親愛暫平生
長風吹北隴迅瀑急東瀛知三既情暢得一乃身貞

右歌四遊

飛策辭國門端儀偃郊樹慈愛徒相思閨中空戀慕
夙隸乖往塗駿足獨歸路舉袂謝時人得道且還去

一作顧

右歌出國

明心弘十力寂慮安四禪青禽承逸軌文驪

一作鑣

鏡重

川驚巖標遠勝鹿野究清玄不有希世寶何以導濛泉
右歌得道

亭亭雙月流朏朏晨霜結川上不徘徊條間亟渝滅靈
知湛常然符應有盈缺感運復來儀且厭人間世

音泄

右歌雙樹

春山玉所府檀林芳所棲引火歸炎燧挹水自清隄菴
園無異轍祇館有同躋比肩非今古接武豈燕齊

右歌賢衆

昔余輕歲月茲也重光陰閨中屏鉛黛闕下掛纓簪
禪
悅兼芳旨法言戀一作忘清琴一異非能辨寵辱誰為心

右歌學徒

峻宇臨層穹蒼蒼疎遠風騰芳清漢裏響梵高雲中金
華紛苒若瓊樹鬱青蔥貞心延淨境邃業嗣天宮

右歌供具

影響未嘗隔晦明殊復親弘慈邈已遠睿后扇高塵區
中提景福寓外沐深仁萬祀留國祚億兆慶唐民

右歌福應

少年子

聞有東方騎遙見上頭人待君送客返桂釵當自陳

江臯曲

林斷山更續洲盡江復開雲峯帝鄉起水源桐柏來

思公子

春盡風颯颯蘭凋木修修王孫久為客思君徒自憂

王孫遊

王臺作
春遊

置酒登廣殿開襟望所思春草行已歇何事久佳期

陽翟新聲

隋書翟
作澤

懷春發下蔡含笑向陽城恥為飛雉曲好作鷦鷯鳴

永明樂十首

玄符昭景厯茂實偶英聲長為南山固永與朝日明
靈丘北翼棲芳林合條起兩代分憲章一朝會書軌
二離金玉相三袞蘭蕙芳重儀文世子再奉東平王
空谷返逸驂陰山響鳴鶴振玉躡丹墀懷芳步青閣

崇文晦已明膠庠雜復整弱臺留折巾沂川詠芳穎
定林去喧俗鹿野出埃霞香風流梵瑄澤雨散雲花
楚望傾澠滌日館仰鑒鈴已晞五雲發方照兩河清
幸哉明盛世壯矣帝王居高門夜不析飲帳曉長舒
總棹金陵渚方駕玉山阿輕露炫珠翠初風搖綺羅
西園抽蕙草北沼掇芳蓮生逢永明樂死日生之年

奉和秋夜長

玉臺作
秋夜

秋夜長夜長樂未央舞袖拂花燭歌聲繞鳳梁

代五雜組

五雜組慶雲發往復還經天月不獲已生胡越

奉和織織

兩頭織織綺上紋半白半黑鷁翔羣
膈膈膊膊烏迷曛磊磊落落玉石分

詩

贈族叔衛軍

台曜澄華鉉岳裁峻經天為象麗地作鎮不器其德有

斐斯文質超瑚璉才逸卿雲搖筆泉瀉動詠靈紛德聲
伊何如蘭之宣貞筠抽箭潤壁懷山六樂畢該五禮備
貫七訓是敷三英有粲惟旦惟公惟公惟旦

從武帝琅琊城講武應詔

治兵聞魯策訓旅見周篇教民良不棄任智理恒全白
日映丹羽頽霞文翠旃凌山炫組甲帶水被戈船凝葭
鬱摧愴清管乍聯綿早逢文化洽復屬武功宣願陪玉
鑾右一舉掃燕然

棲玄寺聽講畢遊邸園七韻應司徒教

道勝業茲遠心閒地能隙桂檠鬱初栽蘭墀坦將闢
虛檐對長嶼高軒臨廣液芳草列成行嘉樹紛如積
流風轉還逕清煙泛喬石日汨山照紅松暎水華碧
暢哉人外賞遲遲眷西夕

雜體報范通直

和璧荆山下隋珠漢水濱無雙自昔代有美今為隣
三楚多秀士江上復才人緯蕭非善賈聖德可名臣
追飛

且學步共子奉清塵紫庭風日好青槐枝葉新徘徊吹
樓側欲見心所親
別君蘭蕙草何用以書紳

別蕭諮議

徘徊將所愛惜別在河梁衿袖三春隔江山千里長寸
心無遠近邊地有風霜勉哉勤歲暮敬矣事

玉臺作慎

容光

山中殊未憚杜若空自芳

寒晚敬和何徵君點

疎酌候冬序閒琴改秋律如何將暮天復值西歸日搖

落迎軒牖飛鳴亂繩草煙灌共深陰風篴兩蕭瑟虛堂
無笑語懷君首如疾早輕北山賦晚愛東臯逸上德可
潤身下澤有徐轡

叶音必

和王友德元古意二首

遊禽暮知返行人獨未歸坐銷芳草氣空度明月輝
容入朝鏡思淚點春衣巫山彩雲沒淇上綠楊稀待君
竟不至秋鴈雙雙飛

霜氣下盟津秋風度函谷念君淒以寒當軒卷羅縠纖

手廢裁縫曲鬢罷膏沐千里不相聞寸心鬱紛蘊平聲况
復飛螢夜木葉亂紛紛

奉和竟陵王郡縣名

追芳承荔浦揖道訊虛丘升裾臨廣牧從望盡平洲曾
山臨翠坂方渠緬清流陽臺翻早茂陰館懷名秋歲宴
東光弭景仄西華收端溪慙昔彥測水謝前修往食曲
阜盛今屬平臺遊燕棠缺初雅鄭衮息遺謳久傾信都
美乃結茂陵儔河間誠可詠南海果難遊

遊仙詩五首

桃李不奢年桑榆多暮節常恐秋蓬根連翩因風雪習
道遍槐岷追仙度瑤碣綠帙啟真詞丹經流妙說長河
且已縈曾山方可礪

叶音列

獻歲和風起日出東南隅鳳旂亂煙道龍駕溢雲區結
賞自員嶠移譙乃方壺金庖浮水翠玉竿挹泉珠徒用
霜露改終然天地俱

命駕瑤池隈過息羸女臺長袖何靡靡簫管清且哀璧

門涼月舉珠殿秋風迴清鳥驚高羽王母停玉杯舉手
暫為別千年將復來

湘沅有蘭芷汨吾欲南征遺珮出長浦舉袂望增城朱
霞拂綺樹白雲照金楹五芝多秀色八桂常冬榮弭節
且夷與參差聞鳳笙

命駕隨所即燭龍導輕鑣沙澤振寒草弱水駕冰潮遠
翔馳聲響流雪自飄飄忽與若士遇長舉入雲霄羅繹
徒有睨螭螭已寥寥

春遊迴文詩

枝分柳塞北葉暗榆關東垂條逐絮轉落蕊散花叢池
蓮照曉月幔錦拂朝風低吹雜綸羽薄粉艷粧紅離情
隔遠道歎結深閨中

侍遊方山應詔

巡躅望登年帳飲臨秋縣日羽鏡霜濤雲旗落風甸四
瀛良在目八寓宛如見小臣竊自嘉預奉柏梁讌

奉辭鎮西應教

未學謝能笑高義幸知遊雷庭參辯爽梁苑豫才鄒徘徊歲光晚搖落江樹秋風旗縈別浦霜瑣迢遙洲

餞謝文學離夜

所知共歌笑誰忍別笑歌離軒思黃鳥分渚夢青莎翻情結遠旆灑淚與行波春江夜明月還望情如何

和南海王殿下詠秋胡妻七首

日月共為照松筠俱以貞佩紛甘自遠結鏡待君明且協金蘭好方愉琴瑟情佳人忽千里幽閨積思生

景落中軒坐悠悠望城闕高樹升夕煙層樓滿初月光
陰非或異山川屢難越輟泣揜鉛姿搔首亂雲髮

傾魄屬徂火搖念待方秋涼氣承宇結明熠僚皆流三
星亦虛暎四屋慘多愁思君如萱草一見乃忘憂

杼軸鬱不諧契濶彌新故朔風欄上發寒鳥林間度客
遠乏衣裘歲晏饒霜露參差興別緒依遲起離慕

願言如可信行邁亦云反睇景不告勞瞻途寧遽遠何
以淹歸轍蠶妾事春晚送目亂前華馳心迷舊婉

椒珮容有結振芳跂路隅黃金徒以賦白珪終不渝明
心良自皎安用久踟躕適車反粉巷流日下西虞

披帷悵有望出門遲所欲彼美復來儀慙顏變欣矚蘭
艾隔芳臭涇渭分清濁去去夫人子請殉川之曲

琵琶

同賦諸
公別見

抱月如可明懷風殊復清絲中傳意緒花裏寄春情掩
抑有奇態悽鏘多好聲芳袖幸時拂龍門空自生

詠慢

古文苑
作謝朓

幸得與珠綴羃歷君之楹月映不辭卷風來輒自輕每
聚金鑪氣時駐玉琴聲但願置尊酒蘭缸當夜明

藥名

重臺信嚴敞陵澤乃閒荒石蠶終未蠶垣衣不可裳秦
弓留近詠楚蘅指遠翔韓原結神草隨庭銜夜光

星名

眇歎屬辰移端憂臨歲永久慙入漢客每愧遵河影仙
羽誠不退蓬襟良未整誰謂無正心大陵有霜穎

奉和月下

雕雲度綺錢香風入珠網獨知此夜月依遲慕神賞
詠池上梨花

翻堦沒細草集水間疎萍芳春照流雪深夕映繁星
詠梧桐

鸞鳳影層枝輕虹鏡展綠豈數龍門幽直慕瑤池曲
詠女蘿

幕歷女蘿草蔓行旁松枝含煙黃且綠因風卷復垂

移席琴室應司徒教

雪崖似留月蘿徑若披雲潺湲石溜寫綿巒山雨聞
抄衆書應司徒教

說禮固多才悖詩信為善巖笥發仙華金滕開碧篆
自君之出矣

自君之出矣芳蕤絕瑤卮思君如形影寢興未曾離
自君之出矣金鑪香不然思君如明燭中宵空自煎

擬古二首

花蒂今何在亦是林下生何當垂雙髻團扇雲間明
鏡臺今何在寸身正相隨何當碎聯玉雲上壁已虧

四色詠

赤如城霞起青如松霧澈黑如幽都雲白如瑤池雪

離合賦物為詠

冰容慙遠鑒水質謝明暉是照相思夕早望行人歸

火

雙聲詩

園蘅眩紅蘼湖荇燁黃華迴鶴橫淮翰遠越合雲霞

聯句

阻雪連句遙贈和

積雪皓陰池北風鳴細枝九達密如繡何異遠別離

謝朓

風庭舞流霰冰沼結文澌飲春雖以燠欽賢紛若馳

江秀

才珠霽條間響玉溜檐下垂杯酒不相接寸心良共知

革才飛雲亂無緒結冰明曲池雖乖促席讌白首信勿

虧王蘭陵飄素瑩簷溜巖結噎通岐罇罍如未澣況乃

僧孺

限音儀謝洗馬原隰望徒倚松筠竟不移隱憂慙萱樹忘

懷待山巵


劉中書繪

初昕逸翮舉日旻駕馬疲幽山有桂樹

歲暮方參差

沈右率約

漢魏六朝百三家集卷七十六



總校官庶吉士臣侍朝

校對官檢討臣王坦修

謄錄監生臣王錫壽

法見團
人佛
陀教
育基
金會
釋淨
空
敬贈



張氏德潤

金德潤

張氏德潤